

**UNDANG – UNDANG PERTUBUHAN
PARTI SOSIALIS MALAYSIA (BARU)
SOCIALIST PARTY OF MALAYSIA**

KANDUNGAN

Pendahuluan

FASAL 1	NAMA
FASAL 2	ALAMAT
FASAL 3	BENDERA DAN LAMBANG
FASAL 4	TUJUAN DAN MATLAMAT
FASAL 5	KEAHLIAN
FASAL 6	YURAN KEAHLIAN
FASAL 7	HAK DAN TANGGUNGJAWAB AHLI
FASAL 8	BERHENTI DAN PEMECATAN AHLI
FASAL 9	TINDAKAN DISIPLIN
FASAL 10	KONGRES NASIONAL
FASAL 11	JAWATANKUASA PUSAT DAN SEKRETARIAT
FASAL 12	TUGAS AHLI JAWATANKUASA PUSAT DAN SEKRETARIAT
FASAL 13	CAWANGAN
FASAL 14	TUGAS AHLI JAWATANKUASA CAWANGAN
FASAL 15	KEWANGAN
FASAL 16	PEMERIKSAAN KIRA-KIRA
FASAL 17	TAFSIRAN UNDANG-UNDANG
FASAL 18	PINDAAN UNDANG-UNDANG
FASAL 19	MEMBUBARKAN PARTI

**UNDANG – UNDANG PERTUBUHAN
PARTI SOSIALIS MALAYSIA (BARU)
(SOCIALIST PARTY OF MALAYSIA)**

Pendahuluan

Parti Sosialis Malaysia (Baru) atau Socialist Party of Malaysia adalah parti politik rakyat Malaysia yang berasaskan prinsip dan ideologi sosialisme yang bersifat perjuangan rakyat berteraskan keadilan sosial dan ekonomi; bagi mewujudkan masyarakat demokratik yang aman, makmur, maju, berakhlak mulia dan saksama. Ia berjuang untuk memenuhi keperluan asas rakyat dan membebaskan rakyat daripada sebarang bentuk penindasan dan pemaksaan.

FASAL 1 NAMA

Nama parti ialah Parti Sosialis Malaysia (Baru) atau PSM dan dalam Bahasa Inggeris sebagai Socialist Party of Malaysia atau SPM, dan seterusnya disebut sebagai “Parti”.

FASAL 2 ALAMAT

Alamat dan ibu pejabatnya ialah di 47, Tingkat 3, Jalan Dinar G, U3/G, Subang Perdana, 40150 Shah Alam atau di mana-mana tempat yang ditentukan oleh Jawatankuasa Pusat Parti dari semasa ke semasa dan dipersetujui oleh Pendaftar Pertubuhan terlebih dahulu.

FASAL 3 BENDERA DAN LAMBANG

Lambang parti ialah genggam tangan kiri yang melambangkan perpaduan rakyat dan semangat perjuangan. Bendera parti berlatarkan warna merah dan ditengahnya gambar genggam tangan berwarna putih. Merah melambangkan perjuangan dan putih melambangkan kesucian dan keikhlasan dalam perjuangan. PSM bermaksud Parti Sosialis Malaysia. Lambang parti adalah seperti berikut



FASAL 4 TUJUAN DAN MATLAMAT

1. Mengamalkan prinsip sosialisme sebagai cara hidup.
2. Mempertahankan masyarakat demokratik dan progresif yang mengutamakan kerohanian, kemanusiaan dan keadilan sebagai asas ke arah pembangunan.
3. Memastikan strategi pembangunan yang mewujudkan hubungan seimbang di antara keperluan sosial dan ekonomi di peringkat individu, masyarakat dan nasional.
4. Mengagihkan kekayaan secara adil dan saksama;
5. Melaksanakan sistem sosioekonomi yang mempunyai mekanisme dalaman untuk menghalang penindasan dan sifat tamak.
6. Memberi peluang kepada rakyat berbilang kaum, jantina, agama, usia, pekerjaan dan daerah serta negeri untuk menyertai proses pembentukan ideologi dan pembinaan semula keutamaan-keutamaan nasional agar wujud persefahaman yang lebih jitu di kalangan kaum, agama dan budaya.
7. Mengukuhkan hak asasi manusia pada setiap peringkat masyarakat dan mendedahkan sebarang bentuk penindasan, nepotisme, hipokradi dan kepalsuan.
8. Menghormati Perlembagaan Persekutuan yang menekankan kepada hak demokratik dan toleransi bahasa, budaya dan agama.
9. Menjamin kebebasan bersuara, berpersatuan dan kecapaian intelektual
10. Memberi keutamaan dalam tanggungjawab sosial terhadap kebajikan pekerja dan keluarga mereka serta keperluan masyarakat terutamanya keselamatan, gaji, rumah dan pemilikan tanah, kemudahan asuhan kanak-kanak, kesihatan, pendidikan, infrastruktur dan sebagainya
11. Menyediakan latihan serta latihan semula yang digabungkan dengan program pendidikan untuk membolehkan penguasaan kemahiran yang lebih baik dan menyedarkan pekerja terhadap hak dan tanggungjawab sosial, politik dan ekonomi mereka kepada masyarakat dan negara.
12. Menjamin hak pekerja untuk menubuhkan kesatuan sekerja yang menjangkau jenis dan bidang pekerjaan serta menggubal undang-undang yang melindungi hak pekerja serta menyediakan suasana pekerjaan yang sesuai agar menjadikan kerja itu sebagai sesuatu yang lebih bermakna dan menggembirakan.
13. Memberi keutamaan kepada kumpulan khas dalam institusi kekeluargaan khususnya wanita yang mengandung dan menyusukan anak, bayi dan kanak-kanak, wargatua dan mereka yang kurang berkeupayaan.
14. Mewujudkan keseimbangan di antara pembangunan pertanian dan industri agar tidak tertumpu kepada kawasan yang tertentu sahaja dan menggalakkan integrasi antara sektor-sektor ekonomi.
15. Memastikan tidak berlaku penindasan dan diskriminasi di semua peringkat bagi sektor perindustrian dan pertanian, iaitu daripada peringkat penghasilan bahan mentah sehingga kepada peringkat pemerosesan (iaitu pengeluaran, pemasangan dan pembinaan), pemasaran dan perkhidmatan. Usaha perlu dilaksanakan untuk menghalang penindasan dan diskriminasi agar tidak memberi kesan buruk kepada hubungan sosial di tempat kerja, keluarga dan masyarakat.
16. Mewujudkan rasa saling menghormati, memahami dan bertolak ansur di kalangan semua agama dan budaya.

17. Menyediakan peluang pendidikan percuma di semua peringkat dengan mewajibkan pendidikan di peringkat rendah dan menengah, dan membuat perancangan sosioekonomi untuk memastikan wujudnya peluang pekerjaan dalam pelbagai bidang.
18. Memastikan penyertaan guru dan pelajar dalam proses menentukan haluan sistem pendidikan nasional.
19. Melindungi alam sekitar daripada pencemaran dan pembinaan dengan mengadakan usaha untuk mendampingi alam semulajadi dan menyediakan gantian yang setimpal terhadap sesuatu tindakan perubahan rupa bumi yang tidak dapat dielakkan.
20. Menyediakan pilihan dalam penggunaan teknologi yang bersesuaian untuk membangunkan sumber negara selaras dengan kehendak rakyat
21. Mengurangkan birokrasi dan menghapuskan karenah birokrasi (red tape) yang mengekang pembangunan – birokrasi hanyalah dianggap sebagai alat untuk mengurus dan memudahkan pentadbiran bagi mencapai matlamat mengikut satu jangkamasa yang ditetapkan.
22. Melaksanakan kegiatan yang dapat meluaskan matlamat parti seperti:
 - I. Mewujudkan perbagai biro secara berperingkat
 - II. Bertanding dalam pilihanraya di semua peringkat
 - III. Menerbitkan bahan bacaan dan audio-video bagi meluaskan penerangan mengenai Parti dan maklumat yang selaras dengan perjuangan Parti dengan syarat mendapat kebenaran dari pihak berkuasa terlebih dahulu
 - IV. Mendapatkan sumber kewangan bagi keperluan Parti
 - V. Bergerak bersama pertubuhan-pertubuhan yang mempunyai cita-cita dan hasrat yang selaras dengan perjuangan Parti.

FASAL 5 KEAHLIAN

1. Terbuka kepada setiap rakyat warganegara Malaysia, berumur 18 tahun atau lebih, tanpa mengira kaum, jantina, warna kulit atau agama, yang sanggup berkhidmat bersama rakyat, khususnya golongan bawahan serta yakin dan mengamalkan prinsip dan cita-cita Parti, dan tidak menjadi ahli mana-mana parti politik lain, adalah layak untuk menjadi ahli Parti.
2. Ahli Parti adalah seorang yang menerima cita-cita, prinsip dan program Parti sebagaimana yang tercatat dalam Perlembagaan dan diluluskan oleh Jawatankuasa Pusat, sentiasa menyertai mesyuarat, aktif dalam kegiatan Parti, sentiasa membayar yuran dan berusaha memahami dan menyelesaikan masalah rakyat.
3. Borang permohonan keahlian boleh diperolehi daripada Cawangan atau Ibu Pejabat Parti. Pemohon perlu mengemukakan borang keahlian yang disahkan oleh sekurang-kurangnya seorang ahli parti. Setiap permohonan perlu dikemukakan kepada Setiausaha Cawangan bersama yuran masuk dan yuran tahunan bagi tahun berkenaan.
4. Setiap permohonan akan dibentangkan dalam mesyuarat Cawangan dan keputusan akan diumumkan kepada pemohon dalam masa 30 hari selepas penerimaan permohonan.

5. Jika permohonan ditolak ataupun tiada sebarang jawapan daripada Cawangan dalam tempoh 30 hari, pemohon boleh merayu kepada Jawatankuasa Pusat. Sebarang keputusan Jawatankuasa Pusat adalah muktamad.
6. Bagi kawasan yang tidak mempunyai Cawangan, permohonan boleh dikemukakan terus kepada Jawatankuasa Pusat. Sebarang keputusan Jawatankuasa Pusat adalah muktamad.

FASAL 6 YURAN KEAHLIAN

1. Yuran tahunan ahli ialah sepuluh ringgit (RM10) setiap tahun dan yuran masuk adalah lima ringgit (RM5).
2. Setiap ahli perlu membayar yuran tahunan pada atau sebelum 7 Februari.

FASAL 7 HAK DAN TANGGUNGJAWAB AHLI

1. Setiap ahli Parti berhak dan bertanggungjawab menyertai proses Parti menggubal dasar dan pemilihan jawatankuasa, sebagaimana yang ditetapkan oleh Perlembagaan. Ahli berhak mengundi bagi penggubalan dasar dan pemilihan pemimpin, jawatankuasa dan perwakilan.
2. Selepas perbincangan di peringkat Cawangan, Jawatankuasa Pusat dan Kongres Nasional, setiap ahli bertanggungjawab melaksanakan keputusan yang ditetapkan.
3. Semua ahli bertanggungjawab menjalin hubungan dengan semua lapisan rakyat, khususnya golongan bawahan, bagi membantu dan berdialog dengan mereka serta menjelaskan cita-cita dan prinsip Parti.
4. Semua ahli harus berusaha memahami dengan lebih mendalam keadaan politik, ekonomi dan sosial semasa, dengan berteraskan analisis sosialisme, iaitu usaha menyelesaikan masalah rakyat demi mewujudkan masyarakat yang lebih adil dan saksama.

FASAL 8 PERHENTIAN DAN PEMECATAN AHLI

1. **Menjadi ahli tanpa mengikut saluran sah** - Jika Jawatankuasa Pusat mendapati ahli tidak mengikut saluran yang sah dan kemudian menjadi ahli, maka keahlian ahli berkenaan adalah terbatal.
2. **Meletak jawatan/Keluar parti** - Ahli boleh pada bila-bila masa memberi notis bertulis kepada Setiausaha Cawangan memaklumkan perletakan jawatan/keluar parti. Jawatankuasa Cawangan berhak mengambil tindakan mahkamah, jika perlu, untuk mendapatkan semula sebarang dokumen, wang, barang-barang atau gantian kerosakan harta Parti daripada ahli berkenaan.

3. **Kematian** - Ahli yang meninggal dunia dianggap berhenti menjadi ahli.
4. **Pemecatan** - Ahli yang dipecat mengikut Fasal 9 dianggap berhenti menjadi ahli.
5. **Tidak membayar yuran** - Ahli yang gagal membayar yuran dalam masa yang dibenarkan mengikut Fasal 6 dianggap berhenti menjadi ahli.
6. **Menjadi ahli parti politik yang lain** - Ahli yang menjadi ahli parti lain atau sudah menyertai parti lain dianggap berhenti menjadi ahli.

FASAL 9 TINDAKAN DISIPLIN

1. Sebuah Jawatankuasa Tatatertib yang dianggotai oleh lima (5) ahli parti yang bukan Ahli Jawatankuasa Pusat perlu dipilih oleh Kongres Nasional dua tahun sekali. Jawatankuasa Tatatertib mempunyai kuasa untuk menggantung mana-mana ahli atau Cawangan bagi sebarang tindakan yang dianggap menjejaskan Parti atau nama Parti sementara menunggu keputusan siasatan.
2. Jawatankuasa Tatatertib mempunyai kuasa menggantung mana-mana ahli, Cawangan, Bahagian atau Pentadbiran Negeri bagi sebarang tindakan yang dianggap menjejaskan Parti atau nama Parti sementara menunggu keputusan siasatan.
3. Ahli yang digantung keahlian akan dipanggil oleh Jawatankuasa Tatatertib untuk mendapatkan penjelasan mengapa ia tidak perlu dipecat oleh Parti. Jawatankuasa Tatatertib akan menentukan keputusan sama ada memecat atau mengenakan tindakan tatatertib, mengikut mana-mana yang perlu.
4. Mana-mana ahli yang tidak puas hati dengan keputusan Jawatankuasa Tatatertib boleh membuat rayuan secara bertulis kepada Jawatankuasa Pusat dalam masa empat belas (14) hari selepas keputusan dimaklumkan kepada ahli berkenaan. Keputusan Jawatankuasa Pusat adalah muktamad, jika tiada rayuan lanjut.
5. Mana-mana ahli yang tidak puas hati dengan keputusan Jawatankuasa Pusat boleh membuat rayuan secara bertulis kepada Kongres Nasional dalam masa empat belas (14) hari selepas keputusan dimaklumkan kepada ahli berkenaan. Keputusan Kongres Nasional adalah muktamad dan tidak boleh dibawa kepada mana-mana Mahkamah.

FASAL 10 KONGRES NASIONAL

1. Kongres Nasional adalah badan tertinggi dalam parti yang menentukan apa yang harus menjadi tugas dan tanggungjawab parti dan Jawatankuasa Pusat. Ia mentakrifkan program politik parti dan memberi keputusan muktamad berhubung organisasi, strategi, taktik dan sebarang pindaan untuk Perlembagaan. Jawatankuasa Pusat dipilih oleh Kongres Nasional.

2. Kongres Nasional akan bersidang setahun sekali dan Perwakilan ke Kongres Nasional adalah Ahli Jawatankuasa Pusat yang sedia ada dan perwakilan yang dipilih oleh Cawangan masing-masing. dalam Mesyuarat Agung Tahunan cawangan.
3. Jawatankuasa Pusat juga boleh menjemput mana-mana ahli parti dan peserta selain dari ahli parti sebagai pemerhati tanpa kuasa mengundi dalam kongres.
4. Notis dan pengumuman awal mengenai Kongres Nasional yang menyatakan tarikh, waktu, tempat, panggilan mengemukakan usul untuk perbincangan, cadangan untuk meminda undang-undang dan percalonan untuk pemilihan Ahli-Ahli Jawatankuasa Pusat hendaklah dikirimkan oleh Setiausaha Agung kepada setiap Setiausaha Cawangan tidak lewat daripada 30 hari sebelum tarikh yang ditetapkan untuk Kongres Nasional.
5. Tiap-tiap Setiausaha Cawangan hendaklah mengadakan Mesyuarat Agung Tahunan Cawangan dalam tempoh masa yang ditetapkan oleh Jawatankuasa Pusat Parti. Nama-nama wakil delegasi, usul untuk pembentangan di Kongres Nasional dan pencalonan untuk pemilihan Ahli Jawatankuasa Pusat dan cadangan lain untuk dibincangkan dalam Kongres Nasional hendaklah dihantar oleh Setiausaha Cawangan kepada Setiausaha Agung tidak lewat daripada 14 hari sebelum tarikh Kongres Nasional.
6. Korum untuk Kongres Nasional dianggap cukup jika Separuh ahli delegasi sah campur satu (50% + 1) delegasi yang dipilih hadir.
7. Jika Korum tidak cukup selepas satu jam daripada waktu yang telah ditetapkan untuk Kongres Nasional, maka Kongres Nasional itu hendaklah ditangguhkan kepada satu tarikh lain yang akan ditetapkan oleh Jawatankuasa Pusat; dan jika korum tidak cukup selepas satu jam daripada waktu yang ditetapkan untuk mesyuarat yang ditangguhkan itu, maka wakil delegasi yang hadir mempunyai kuasa untuk menjalankan mesyuarat pada hari tersebut tetapi tiadalah berkuasa meminda undang-undang Pertubuhan Parti.
8. Mesyuarat khas, selain Kongres Nasional, dalam tahun yang sama boleh diadakan atas permintaan dua pertiga ahli Jawatankuasa Pusat atau satu pertiga daripada jumlah semua Cawangan dengan syarat cawangan-cawangan itu telah mengadakan mesyuarat khas Cawangan atas perkara yang sama.
9. Kongres Nasional harus memilih seorang Speaker untuk mengendalikan mesyuarat yang mana Speaker juga mempunyai hak mengundi.
10. Pengumuman dan agenda untuk Kongres Nasional Khas hendaklah diedarkan kepada semua Setiausaha Cawangan oleh Setiausaha Agung tidak lewat daripada 14 hari sebelum tarikh yang telah ditetapkan untuk Kongres Nasional Khas.
11. Fasa 10(6) dan 10 (7) di dalam undang-undang ini berkenaan korum dan penangguhan Kongres Nasional boleh digunakan untuk Kongres Nasional Khas, tetapi dengan syarat jika korum tidak mencukupi selepas satu jam dari waktu yang telah ditetapkan bagi Kongres Nasional Khas itu atas permintaan cawangan-cawangan, maka mesyuarat itu hendaklah dibatalkan dan sekurang-kurangnya 6

bulan daripada tarikh ini, Kongres Nasional Khas yang dipohon dengan tujuan yang sama tidak boleh diadakan.

FASAL 11 JAWATANKUASA PUSAT DAN SEKRETARIAT

1. (a) Jawatankuasa Pusat dianggotai seperti berikut:
 - I. Seorang Pengerusi
 - II. Seorang Timbalan Pengerusi
 - III. Seorang Setiausaha Agung
 - IV. Seorang Timbalan Setiausaha Agung
 - V. Seorang Bendahari
 - VI. Seorang Timbalan Bendahari
 - VII. Sembilan Ahli Jawatankuasa (9 ahli)
- (b) Semua ahli yang berkhidmat didalam Jawatankuasa Pusat dan tiap-tiap pegawai yang menjalankan tugas eksekutif di dalam parti itu hendaklah warganegara Malaysia.
2. Pemilihan bagi Ahli Jawatankuasa Pusat diadakan setiap dua tahun sekali dalam Kongres Nasional. Setiap ahli berhak bertanding semua jawatan. Ahli Jawatankuasa Pusat dipilih daripada perwakilan dalam Kongres Nasional.
3. Jawatankuasa Pusat adalah badan tertinggi selepas Kongres Nasional. Ia memastikan pelaksanaan dasar yang diputuskan dalam Kongres Nasional dan menangani perkara-perkara penting dalam parti apabila Kongres Nasional tidak bersidang.
4. Jawatankuasa Pusat harus bermesyuarat sekurang-kurangnya sekali sebulan dan notis pengumuman bagi tiap-tiap mesyuarat hendaklah diberikan seminggu sebelum mesyuarat Jawatankuasa Pusat. Korum kehadiran adalah sekurang-kurangnya separuh daripada bilangan ahli-ahli Jawatankuasa Pusat bagi mengesahkan perjalanan dan mencukupkan korum mesyuarat.
5. Bagi menjalankan tugas pentadbiran harian dan urusan perkara-perkara tergepar, sebuah Sekretariat ditubuhkan oleh Jawatankuasa Pusat dengan dianggotai oleh:
 - I. Pengerusi,
 - II. Timbalan Pengerusi,
 - III. Setiausaha Agung,
 - IV. Bendahari
 - V. Ahli Jawatankuasa (3 ahli)
6. Sekretariat harus bermesyuarat sekerap yang mungkin dengan kuorum sekurang-kurangnya separuh daripada keahlian. Setiausaha, dengan kebenaran Sekretariat, boleh menjemput mana-mana ahli parti untuk menghadiri mesyuarat Sekretariat, dengan syarat ahli berkenaan tidak mempunyai hak untuk mengundi.

7. Keputusan Sekretariat harus dilaporkan oleh Setiausaha dengan menyediakan minit mesyuarat kepada Jawatankuasa Pusat.
8. Jika seorang Ahli Jawatankuasa Pusat meninggal dunia atau meletakkan jawatan maka Jawatan tersebut dianggap kosong sehingga kongres yang akan datang..

FASAL 12 TUGAS AHLI JAWATANKUASA PUSAT DAN SEKRETARIAT

1. Pengerusi bertanggungjawab memanggil dan mempengerusikan Mesyuarat Jawatankuasa Pusat, Mesyuarat Sekretariat dan mesyuarat-mesyuarat lain. Pengerusi bertanggungjawab menandatangani minit mesyuarat dan menjaga pentadbiran Parti, memastikan semua Ahli Jawatankuasa menjalankan tugas dan tanggungjawab, memegang amanah menjaga kepentingan Parti.
2. Timbalan Pengerusi bertanggungjawab membantu Pengerusi. Apabila ketiadaan Pengerusi, Timbalan Pengerusi akan memangku jawatan Pengerusi dan menjalankan tugas dan tanggungjawab Pengerusi.
3. Setiausaha Agung bertanggungjawab menjalankan tugas mengikut arahan Pengerusi dan Jawatankuasa Pusat dan Sekretariat dan apabila diarahkan oleh Jawatankuasa Pusat atau Sekretariat, Setiausaha Agung berhak memanggil mesyuarat. Setiausaha Agung bertanggungjawab menyimpan rekod semua mesyuarat, surat-menyurat, dokumen dan sebarang dokumen berkaitan, menyelenggara buku daftar ahli, menyediakan dan mengemukakan laporan kepada Jawatankuasa Pusat dan Sekretariat serta Kongres Nasional. Setiausaha hendaklah dalam masa 60 hari dari tarikh Kongres Nasional diadakan mengemukakan penyata tahunan parti kepada Pendaftar Pertubuhan sebagaimana yang dikehendaki di bawah Seksyen 14 (1) Akta Pertubuhan 1966.
4. Timbalan Setiausaha Agung bertanggungjawab membantu Setiausaha Agung . Apabila ketiadaan Setiausaha Agung, Timbalan Setiausaha Agung akan memangku jawatan Setiausaha Agung dan menjalankan tugas dan tanggungjawab Setiausaha Agung.
5. Bendahari bertanggungjawab menerima yuran, menyimpan buku akaun dan menjaga amanah kewangan Parti serta menyediakan dan mengemukakan laporan kewangan kepada setiap mesyuarat Jawatankuasa Pusat dan Sekretariat dan Kongres Nasional.
6. Timbalan Bendahari bertanggungjawab membantu Bendahari. Apabila ketiadaan Bendahari, Timbalan Bendahari akan memangku jawatan Bendahari dan menjalankan tugas dan tanggungjawab Bendahari.
7. Ahli Jawatankuasa biasa akan diberi tugas-tugas yang bersesuaian oleh Jawatankuasa Pusat.

FASAL 13 CAWANGAN

1. Cawangan Parti boleh ditubuhkan dengan mempunyai sekurang-kurangnya lima belas (15) ahli dan penubuhannya perlu disahkan oleh Jawatankuasa Pusat dan hendaklah dibenarkan secara bertulis oleh Pendaftar Pertubuhan terlebih dahulu.
2. Jawatankuasa Pusat juga mempunyai kuasa untuk membatalkan Cawangan jika ahlinya kurang daripada lima belas (15) orang dalam tempoh enam (6) bulan berturut-turut atau jika dianggap melanggar Perlembagan dan peraturan Parti atau keputusan Jawatankuasa Pusat.
3. Mesyuarat Agung tahunan Cawangan hendaklah memilih seorang warganegara Malaysia memegang setiap jawatan-jawatan berikut:-
 - I. Pengerusi
 - II. Naib Pengerusi
 - III. Setiausaha
 - IV. Bendahari
 - V. Ahli Jawatankuasa (3 ahli)
4. Mesyuarat Agung tahunan Cawangan, bagi setiap dua tahun, harus memilih satu (1) orang perwakilan bagi setiap lima (5) ahli untuk peringkat Kongres Nasional. Mereka akan menjadi perwakilan bersama dengan Pengerusi dan Setiausaha Cawangan. Notis dan pengumuman awal mesyuarat tersebut hendaklah dihantar oleh setiausaha cawangan kepada ahli-ahli tidak lewat daripada 21 hari sebelum tarikh untuk mesyuarat.
5. Jika Korum tidak cukup selepas setengah jam daripada waktu yang telah ditetapkan untuk mesyuarat Agung Tahunan Cawangan, maka Mesyuarat Agung Tahunan Cawangan itu hendaklah ditangguhkan kepada suatu tarikh (tidak lebih daripada 7 hari) yang ditetapkan oleh Jawatankuasa Cawangan dan jika korum tidak cukup selepas setengah jam daripada waktu yang ditetapkan untuk mesyuarat yang ditangguhkan itu, maka ahli-ahli berkuasa menjalankan mesyuarat tetapi tidaklah berkuasa membuat keputusan-keputusan yang melibatkan semua ahli.
6. Tugas Jawatankuasa Cawangan adalah menguruskan hal-ehwal Cawangan mengikut Perlembagaan, Sekretariat, Jawatankuasa Pusat dan Kongres Nasional, serta mengemukakan cadangan-cadangan kepada Sekretariat, Jawatankuasa Pusat dan Kongres Nasional.
7. Jawatankuasa Cawangan bertanggungjawab mengadakan mesyuarat sekurang-kurangnya sebulan sekali dengan kuorum sekurang-kurangnya separuh jumlah Ahli Jawatankuasa. Notis tidak kurang dari satu minggu mesti diberi kepada ahli Jawatankuasa Cawangan. Ahli cawangan berhak menghadiri mesyuarat dan boleh bersuara tetapi tidak dibenarkan mengundi. Minit mesyuarat perlu disediakan oleh Setiausaha Cawangan dan dikemukakan kepada Setiausaha Agung tidak lewat dari empat belas (14) hari selepas mesyuarat diadakan.

8. Korum Mesyuarat Agung Tahunan Cawangan dianggap cukup jika separuh jumlah ahli cawangan berhak mengundi atau dua kali jumlah ahli jawatankuasa cawangan mengikut mana yang kurang hadir di dalam mesyuarat tersebut.
9. Mesyuarat Agung Khas Cawangan boleh diadakan atas arahan Jawatankuasa Pusat atau apabila Jawatankuasa Cawangan memikirkannya mustahak atau atas permintaan bertulis tidak kurang daripada satu pertiga jumlah ahli cawangan dengan menyatakan tujuan dan sebab mengadakannya. Mesyuarat itu hendaklah diadakan dalam tempoh 15 hari dari tarikh penerimaan permintaan daripada ahli-ahlinya.
10. Fasa 13(8) dan 13(5) di dalam undang-undang ini boleh digunakan untuk Mesyuarat Agung Khas Cawangan, dengan syarat jika korum tidak mencukupi selepas satu jam dari waktu yang telah ditetapkan bagi mesyuarat tersebut atas permintaan ahli-ahlinya, maka mesyuarat itu hendaklah dibatalkan dan sekurang-kurangnya 6 bulan daripada tarikh ini, mesyuarat tersebut yang dipohon dengan tujuan yang sama tidak boleh diadakan.

FASAL 14 TUGAS AHLI JAWATANKUASA CAWANGAN

1. Pengerusi Cawangan bertanggungjawab mempengerusikan Mesyuarat Agung Tahunan, Mesyuarat Bulanan Jawatankuasa dan mesyuarat-mesyuarat lain, menandatangani minit mesyuarat dan menjaga pentadbiran Cawangan, memastikan semua pemegang jawatan menjalankan tugas dan tanggungjawab, memegang amanah menjaga dokumen, buku, harta dan wang Cawangan dan berhak mendapatkan dokumen, buku, harta dan wang untuk sebarang semakan dan penyelidikan.
2. Naib Pengerusi Cawangan bertanggungjawab membantu Pengerusi. Apabila ketiadaan Pengerusi, Naib Pengerusi memangku jawatan Pengerusi dan menjalankan tugas dan tanggungjawab Pengerusi.
3. Setiausaha Cawangan bertanggungjawab menjalankan tugas dan memanggil mesyuarat mengikut arahan Pengerusi atau Jawatankuasa Cawangan. Setiausaha bertanggungjawab menyimpan rekod semua mesyuarat, surat-menyurat, dokumen dan sebarang dokumen berkaitan, menyelenggara daftar ahli, menyediakan dan mengemukakan laporan kepada Jawatankuasa untuk Mesyuarat Agung Tahunan.
4. Bendahari bertanggungjawab menerima yuran, menyimpan buku akaun dan menjaga amanah kewangan Cawangan serta menyediakan dan mengemukakan laporan kewangan kepada setiap mesyuarat Jawatankuasa Cawangan dan Mesyuarat Agung Tahunan Cawangan.
5. Ahli Jawatankuasa biasa akan diberi tugas-tugas yang bersesuaian oleh Jawatankuasa Pusat

FASAL 15 KEWANGAN

1. Semua wang Parti perlu disimpan oleh Bendahari dalam akaun Parti di bank yang diluluskan oleh Jawatankuasa Pusat. Semua wang yang diterima perlu disimpan dalam bank dalam masa tiga (3) hari selepas penerimaan ke dalam akaun Parti.
2. Bendahari berhak memegang tidak lebih daripada RM500 wang tunai Parti untuk perbelanjaan pada satu-satu masa dan sebarang pengeluaran wang yang melebihi RM200 perlu mempunyai tandatangan Bendahari dan Pengerusi atau Setiausaha.
3. Sebarang perbelanjaan melebihi RM1,000 tidak boleh dikeluarkan tanpa mendapat kelulusan Jawatankuasa Pusat. Bendahari juga bertanggungjawab menyediakan akaun Parti untuk keperluan Audit untuk dikemukakan kepada Kongres Nasional.
4. Semua wang Cawangan perlu disimpan oleh Bendahari Cawangan dalam akaun Cawangan di bank yang diluluskan oleh Jawatankuasa Cawangan. Semua wang yang diterima perlu disimpan dalam bank dalam masa tiga (3) hari selepas penerimaan ke dalam akaun Cawangan.
5. Bendahari Cawangan berhak memegang tidak lebih RM200 wang tunai cawangan untuk perbelanjaan pada satu-satu masa dan sebarang pengeluaran wang yang melebihi RM100 perlu mempunyai tandatangan oleh Bendahari dan Pengerusi atau Setiausaha.
6. Sebarang perbelanjaan melebihi RM400 tidak boleh dikeluarkan tanpa mendapat kelulusan Jawatankuasa Cawangan. Bendahari juga bertanggungjawab menyediakan akaun cawangan untuk keperluan Audit untuk dikemukakan kepada Mesyuarat Agung Tahunan.
7. Penyata darihal wang yang diterima dan dibelanjakan serta kunci kira-kira bagi setahun hendaklah disediakan oleh Bendahari dan diperiksa oleh Pemeriksa Kira-kira yang dilantik di bawah Fasal 16 undang-undang ini dengan seberapa segera setelah tamatnya tahun kewangan. Penyata kira-kira yang telah diaudit itu hendaklah dikemukakan untuk diluluskan oleh Kongres Nasional yang berikut dan salinannya boleh diperolehi untuk makluman ahli di alamat tempat urusan Parti yang berdaftar dan dari pejabat tiap-tiap cawangan.
8. Tahun kewangan Parti ini bermula dari 1hb Januari dan berakhir pada 31hb Disember tiap-tiap tahun.

FASAL 16 PEMERIKSAAN KIRA-KIRA

1. Kongress Nasional perlu melantik seorang akauntan bertauliah atau syarikat akauntan bertauliah sebagai juruaudit untuk memeriksa kira-kira wang dan harta Parti
2. Kongress Nasional juga perlu melantik dua orang juruaudit yang terdiri daripada ahli parti bagi memeriksa kira-kira wang dan harta Parti dan semua cawangan bagi setahun dan membuat laporan untuk Kongres Nasional dan Mesyuarat Tahunan Cawangan.

FASAL 17 TAFSIRAN UNDANG-UNDANG

1. Di antara berlangsungnya Kongres Nasional, Jawatankuasa Pusat boleh memberi tafsirannya kepada undang-undang ini dan Jawatankuasa Pusat, jika mustahak, boleh memutuskan perkara-perkara yang tidak terkandung di dalam undang-undang ini.
2. Kecuali perkara-perkara yang bertentangan atau tidak selaras dengan dasar yang telah dibuat dalam Kongres Nasional, keputusan Jawatankuasa Pusat ke atas ahli-ahli adalah muktamad jika tidak diubah oleh keputusan Kongres Nasional.

FASAL 18 PINDAAN UNDANG-UNDANG

1. Perlembagaan ini atau sebarang bahagian daripadanya boleh dipinda atau dimansuhkan dengan mengadakan Kongres Nasional atau Kongres Nasional Khas mengikut FASAL 10.
2. Permindahan Perlembagaan adalah tertakluk kepada keputusan majoriti dua pertiga daripada ahli yang menghadiri Kongres Nasional untuk membolehkan pindaan atau pemansuhan sebarang bahagian daripada Perlembagaan.
3. Permohonan untuk pindaan dan perubahan undang-undang hendaklah dibuat kepada Pendaftar Pertubuhan dalam tempoh 60 hari dari tarikh keputusan Kongres Nasional meluluskan pindaan atau perubahan itu dan hanya boleh berkuatkuasa mulai daripada tarikh pindaan-pindaan dan perubahan-perubahan itu dibenarkan oleh Pendaftar Pertubuhan.

FASAL 19 MEMBUBARKAN PARTI

1. Parti boleh dibubarkan secara sukarela melalui ketetapan oleh tidak kurang daripada tiga-perempat ($3/4$) daripada jumlah semua ahli Parti yang hadir di dalam suatu Kongres Nasional yang dipanggil khas kerananya. Jika Parti dibubarkan mengikut peruntukan di atas, semua hutang dan tanggungan Parti yang sah mengikut undang-undang hendaklah dijelaskan, dan sebarang baki akan diselesaikan dengan cara yang ditentukan oleh Kongres Nasional.
2. Kenyataan mengenai pembubaran itu hendaklah disampaikan kepada Pendaftar Pertubuhan di dalam masa 14 hari daripada tarikh pembubaran itu.

TAMAT

PENGESAHAN UNDANG-UNDANG PARTI SOSIALIS MALAYSIA

Kami dengan ini mengaku bahawa dokumen ini merupakan Undang-undang Parti Sosialis Malaysia seperti yang dipersetujui dalam mesyuarat penubuhan Parti Sosialis Malaysia pada 19hb. Jun 2008



Mohd Nasir Bin Hashim
Pengerusi Jawatankuasa Penaja
Parti Sosialis Malaysia



Arutchelvan a/l Subramaniam
Setiausaha Jawatankuasa Penaja
Parti Sosialis Malaysia